

ESDRAS

1 Mbu Cyrus njô bôt ya Perse a nga taté jôô, amu ajô Jehova e nga yiane boban ane a nga jô a anyu Jérémie, ane Jehova a nga fô'ô nleme Cyrus njô bôte ya Perse, nde te a nga lôme tyiñ si jé ése a nga jôô, a tili fe je kalate, a jô na, 2 Avale di nde Cyrus njô bôte ya Perse a jô, na, Jehova, Zambe ya yôp, a vey a me meyoñe mese ya si nyô ; ane a nga tiñeti fe me na, me lôñe nye nda Jérusalem, nnye a ne Juda. 3 Môt ase ya bôte bé bese a ne be mia, Zambe wé a tabe'e be nye, a nnye ate a yiane bet a ke Jérusalem, nnye a ne Juda, a lôñ nda Jehova, Zambe ya Israël (nnye ate a ne Zambe), nje é ne Jérusalem. 4 A môt ase a lí'i, vôm ase a ne ntabe, bôt ya vôm a to be volô'ô nye a argent, a or, a akum, a biyem, te lañ mvean ane nlem w'anye'e b'ave mfa'a ya nda Zambe é ne Jérusalem.

5 Eyoñ éte minlô mi bôte ya menda beésa ya Juda a Benjamin mi nga kôlô si, a beprêtre, a Belévite, ba bese Zambe a nga fô'ô be minleme na, be kôlô si a ke lôñ nda Jehova é ne Jérusalem. 6 Ane ba bese be nga to be mbôma'ane be nga ve mo map ngu a biôm bi argent, a or, a akum, a biyem, a biôm bi ne bidima, te lañe fe biôm bise bi nga veban ane minlem mi anye'e. 7 Nalé fe Cyrus njô bôt a nga kuli biôme ya nda Jehova atan, mbie Nebucadnetsar a nga soo bie Jérusalem, a futi nda ya bezambe bé été ; 8 mbie bite Cyrus njô bôte ya Perse a nga kuli atan a mo me Mithredath mba'ale akum, a lañe bie a kee bie Scheschbatsar, évete ya Juda. 9 Tañe ya été é ne na : mimbôngô bisua ya argent toyini wua, atyeñ mewôm mebaé a ébu, 10 bido'o bisua ya or mewôm mela, bido'o bisua ya or mewôm mela, bido'o bisua bi argent argent aval afe mintete minyin a awôme da, a bisua bife toyini wua. 11 Biôm bise ya or a argent bi mbe betoyini betan a mintete minyin. Biôm bite bise Scheschbatsar a nga ke bie, éyoñ ba be nga to minkôm be nga nyoñebane Babylone a ke Jérusalem.

2 Bana be ne bone ya étune si, be nga kôlô minkôme ya ba be nga nyoñeban, mbe Nebucadnetsar njô bôte ya Babylone a nga ke be Babylone, a be nga bulane Jérusalem a Juda, môt ase nleme wé; 2 mbe be nga ke nsamba Zorobabel, Josué, Néhémie, Sereja, Réelaja, Mardochée, Bilschan, Mispar, Bigvaï, Rehun, A Baana.

Tañe befam ya bôte ya Israël: 3 Bone be Pareosch, betoyini bebaé ntete wua mewôme zañbwa a bebaé. 4 Bone be Schepathia, mintete mila mewôme zañbwa a bebaé. 5 Bone be Arach, mintete zañbwa mewôme zañbwa a betan. 6 Bone be Pachath-Moab, mfa'a ya bone be Josué a Joab, betoyini bebaé mintete mwom awôme da a bebaé. 7 Bone be Élam, toyini wua mintete mibaé mewôm metan a benyin. 8 Bone be Zattu, mintet ébu mewôm menyin a betan. 9

Bone be Zaccai, mintete zañbwa a mewôm mesaman. 10 Bone be Bani, mintete misaman mewôm menyin a bebaé. 11 Bone be Bébaï, mintete misaman mewôm mebaé a bela. 12 Bone be Azgad, toyini wua mintete mibaé mewôm mebaé a bebaé. 13 Bone be Adonikam, mintete misaman mewôm mesaman a besaman. 14 Bone be Bigvai, betoyini bebaé mewôm metan a besaman. 15 Bone be Adin, mintete minyin mewôm metan a benyin. 16 Bone be Ather, mfa'a ya Ézéchias, mewôm ébu a mwom. 17 Bone be Betsai, mintete mila mewôm mebaé a bela. 18 Bone be Jora, ntete wua awôme da a bebaé. 19 Bone be Haschum, mintete mibaé mewôm mebaé a bela. 20 Bone be Guibbar, mewôm ébu a betan. 21 Bone be Bethléhem, ntete wua mewôm mebaé a bela. 22 Befame ya Nethopha, mewôm metan a besaman. 23 Befam ya Anathoth, ntete wua mewôm mebaé a mwom. 24 Bone be Azmaveth, mewôm menyin a bebaé. 25 Bone be Kirjath-Arim, Kephira, a Beéroth, mintete zañbwa mewôm menyin a bela. 26 Bone be Rama a Guéba, mintete misaman mewôm mebaé a wua. 27 Befame ya Micmas, ntete wua mewôm mebaé a bebaé. 28 Befam ya Béthel a Ai, mintete mibaé mewôm mebaé a bela. 29 Bone be Nebo, mewôm metan a bebaé. 30 Bone be Magbisch, ntete wua mewôm metan a besaman. 31 Bone be Élam mbok, toyini wua mintete mibaé mewôm metan a benyin. 32 Bone be Harim, mintete mila a mewôm mebaé. 33 Bone be Lod, Hadid, a Ono, mintete zañbwa mewôm mebaé a betan. 34 Bone be Jéricho, mintete mila mewôm menyin a betan. 35 Bone be Senaa, betoyini bela mintete misaman a mewôm mela.

36 Beprêtre: bone be Jedaeja, mfa'a ya nda bôte Josué, mintet ébu mewôme zañbwa a bela. 37 Bone be Immer, toyini wua mewôm metan a bebaé. 38 Bone be Paschhur, toyini wua mintete mibaé mewôm menyin a zañbwa. 39 Bone be Harim, toyini wua awôme da a zañbwa.

40 Belévite: bone be Josué a Kadmiel, mfa'a ya bone be Hodavia, mewôme zañbwa a benyin. 41 Beyia bia : bone be Asaph, ntete wua mewôm mebaé a mwom. 42 Bone ya beba'ale mimbé: bone be Schallum, bone be Ather, bone be Thalmon, bone be Akkub, bone be Hathitha, a bone be Schobai, bese ntete wua mewôm mela a ébu.

43 Benéthinien: bone be Tsicha, bone be Hasupha, bone be Thabbaoth, 44 bone be Kéros, bone be Siaha, bone be Padon, 45 bone be Lebana, bone be Hagaba, bone be Akkub, 46 bone be Hagad, bone be Schamlaï, bone be Hanan, 47 bone be Guiddel, bone be Gachar, bone be Reaja, 48 bone be Restin, bone be Nekoda, bone be Gazzam, 49 bone be Uzza, bone be Paséach, bone be Bésaï, 50 bone be Asna, bone be Mehunim, bone be Nephusim, 51 bone be Bakbuk, bone be Hakupha, bone be Harhur, 52 bone be Batsluth, bone be Mehida, bone be Harscha, 53 bone be Barkos, bone be Sisera, bone be Thamach, 54 bone be Netsiach, bone be Hathipha.

55 Bone ya bebo bisaé be Salomon: bone be Sothaï, bone be Sophéreth, bone be Peruda, 56 bone be Jaala, bone be Darkon, bone be Guiddel, 57 bone be Schephathia, bone be Hatthil, bone be Pokéreth- Hatsebaïm, bone be Ami. 58 Benéthinien bese, a bone ya bebo bisaé be Salomon, be mbe bôte mintete mila mewôm ébu a bebaé.

59 Bana be ne ba be nga kôlô Thel-Mélach, Thel-Harscha, Kerub, Addan, a Immer; ve be nji bo ngule ya lañe menda ya beésa bap, a mvoñe jap, nge be ne ba ya Israël: 60 bone be Delaja, bone be Tobija, a bone be Nekoda, bôte mintete

misaman mewôm metan a bebaé. 61 Nalé fe mfa'a bone ya beprêtre: bone be Habaja, bone be Hakkots, a bone be Barzillai, nyô a nga lu'u minga be bengone ya Barzillai mone Galaadite, a yôbane fe jôé dap. 62 Balé bete be nga jeñ ntilane wop nsamba ya ba be nga lañebane bindan, ve be nji yene be: ajô te be nga lañebane na, be nto nsem, a be nga vaa be éto beprêtre. 63 Ane njôô a nga jô be na, be bo te di biôm bi adañ étyi, akekui prêtre aye tebe a bili Urim a Thummim.

64 Ngum ésulán ôse ô mbe tañe bôt betoyini mewôm menyin a bebaé mintete mila a mewôm mesaman, 65 te lañe bebo bisaé be fam a bebo bisaé be binga, mbe be nga to betoyini zañbwa mintete mila mewôm mela a zañbwa: be nga bili fe befam b'ayia bia a binga b'ayia bia mintete mibaé. 66 Bikabela biap bi nga to mintete zañbwa mewôm mela a besaman; bemulet bap, mintete mibaé mewôm menyin a betan; 67 bechameau bap, mintete minyin mewôm mela a betan; a bijakase biap, betoyini besaman mintete zañbwa a mewôm mebaé.

68 Minlô mi bôte mivo'o ya menda beésa, éyoñ mi nga kui nda Jehova é ne Jérusalem, mi nga ve a nye'ane wop ôse mfa'a ya nda Zambe a kômbô telé je vôme wé: 69 be nga ve vôm be nga naan akume ya ésaé, mô t ase abim ane ngule jé, bedarique ya or betoyini mewôm mesaman a wua, a bemine be argent betoyini betan, a biwomane beprêtre ntete wua.

70 Nalé ate beprêtre, a Belévite, a bôte bevok, a beyia bia, a beba'ale mimbé, a Benéthinién, be nga tabe minlam miap, a Israël ase minlam miap.

3 Eyoñ ngone zañbwale é nga kpwan, a bone be Israël be nto minlam, bôt be nga sulane vôme wua Jérusalem aval ane môte wua. 2 Eyoñ éte Josué mone Jotsadak, a bobenyañe bé beprêtre, a Zorobabel mone Schealthiel, ba be bobenyañe bé, be nga kôlô si a lôñ autel ya Zambe ya Israël, mfa'a ya tyi'i mimvean b'adi'i nduan été yôp, aval ane e ne ntilane metiñe me Moïse môte ya Zambe. 3 Ane be nga telé autel ate mbôka'a wé yôp; amu woñ ô nga bi be amu ajô bôte ya mesi: ane be nga tyi'i Jehova mimvean b'adi'i nduan été yôp, mimvean b'adi'i nduan mam me tyé a mam me ngô'é. 4 Ane be nga ba'ale fête ya bibem, aval ane e ne ntilan, a tyi'i mimvean b'adi'i nduane ya môs ôse ane tañe ya été é né, aval ane atiñ e né, avale fe ane e nga yiane môs ôse; 5 jam ete e maneya, ane be nga tyi'i fe mvean b'adi'i nduan melu mese, a mimveane ya meté bengon, a mi ya befête ya Jehova bese be ne mintiñetan bôt be nga telé étyi be Zambe, a mi ya mô t ase a nga ve Jehova mvean ane nlem w'anye'e a nlem ôse. 6 Be nga taté tyi'i Jehova mimvean b'adi'i nduan ataté mose ya ôsu ngone zañbwale: ve mbôka'a ya temple Jehova ô ngenan te tame bô'ôban. 7 Ane be nga ve fe mintyetyeñ mi abo ésaé mekok a bilé moné; a ve bôte ya Sidon, a ba ya Tyr, bidi, a binyunyui, a mbon, na, be zu bilé bi cèdre aso Liban akui mañ, akui Japho, aval ane Cyrus njô bôte ya Perse a nga ve be.

8 Mbu baa ya nkuian be nga kui nda Zambe Jérusalem, ngone baa, ane Zorobabel mone Schealthiel, a Josué mone Jotsadak, a bobenyañe bap bevok beprêtre a Belévite, a ba bese be nga so minkôm a zu Jérusalem, be nga taté telé

Belévite ataté ba be nga to mimbu mewôm mebaé a ke ôsu, be jôô ésaé ya Jehova. 9 Eyoñ éte Josué a nga tebe, ba be bo be fam bé a bobenyañe bé, Kadmiel ba be bo be fam bé, bone be Juda, aval ane môte wua, ane b'aye jôô bôt b'abo ésaé nda Zambe: a bone be Hénadad, ba be bo be fam bap a bobenyañe bap Belévite. 10 Eyoñ belôñ be nga bô'ô mbôka'a ya temple Jehova, ane be nga telé beprêtre be be'e ngômesane jap be bili metoñ, a Belévite bone be Asaph be bili biwoé, na, be kañe Jehova, a tôñ nkôman David njô bôte ya Israël a nga kôm. 11 Ane be nga yia bia a kañese, a kañe Jehova a ve nye akéva, a jô na, Amu a ne mvaé, amu mvame jé é to nnôm éto mfa'a ya Israël. Ane bôte bese be nga bete metyiñe yôp beta mbetan, éyoñ be nga kañe Jehova, amu mbôka'a ya nda Jehova ô maneya bô'ôban. 12 Ve abui beprêtre a Belévite a minlô mi bôte ya menda beésa, minnôm mi bôt mi nga yen nda ya ôsu, éyoñ mbôka'a ya nda éte ô nga bô'ôban mise map me lô, be nga dañe yi tyiñe yôp: a abui e nga bete metyiñe yôp amu avak: 13 ajô te bôt be nji bo ngule ya kandé zô'é mbetane tyiñe ya mevak a zô'é ya ñyian bot be nga yi du; amu bôt be nga dañe bete metyiñe yôp ngu, zô'é éte é wôké'é ôyap.

4 Eyoñ besiñe be Juda a Benjamin be nga wô'ô na, bôt be nga so minkôm be nga lôñe Jehova, Zambe ya Israël, temple, 2 ane be nga zu be Zorobabal, a be minlô mi bôte ya menda beésa, a jô be na, Kañesa'ane na, bia be mia bi lôñ; amu bi ajeñe Zambe wônan, ane mi abo; bi atyi'i fe nye biôm ataté melu me Ésar-Haddon njô bôte ya Assyrie, nnye a nga zu bia nné. 3 Ve Zorobabel, a Josué, a minlô mi bôte mivo'o ya menda beésa ya Israël, be nga jô be na, Mi nji bo be bia mfa'a ya lôñe Zambe wongan nda; ve biabebien biabebien bi aye lôñe je Jehova, Zambe ya Israël, aval ane njô bôt Cyrus njô bôte ya Perse a nga tiñeti bia. 4 Eyoñ éte bôte ya si éte be nga ve mo me bôte ya Juda atek, a ndeñele be melôñ, 5 a kuse fe bebôndé mefe'e ya tebe be ngame yat, a tyame fe'e jap, melu mese Cyrus njô bôte ya Perse a nga to, a ke fe kui melu Darius njô bôte ya Perse a nga jôô. 6 Nde melu Assuérus a nga jôô bôt, melu ya a nga taté jôô, mme be nga tili bifia ya bo'olô bôt be nga to Juda a Jérusalem.

7 Nde fe melu Artaxerxès a nga jôô, mme Bischlam, Mithredath, a Thabeel, a bôte bevo'o ya nsamba wé, be nga tili Artaxerxès njô bôte ya Perse; a ntilane ya kalate ô mbe ntilane bikanga bi Syrie, a mejô ya été ntilan nkobô Syrie. 8 Ane Rehum njôô ba Schimschaï ntili bekalate be nga tili Artaxerxès njô bôt kalate ya bo'olô Jérusalem avale di: 9 éyoñ éte Rehum njôô a nga tili kalate, ba Schimschaï ntili bekalate, a bôte bevo'o ya nsamba wop, a ba ya Din, Arpharsathac, Tharpel, Aphas, Érec, Babylone, Suse, Déha, Élam, 10 a meyoñe mevo' Osnappar ate a ne éwôlô a дума a nga soo me, a telé me n lame ya Samarie, a mfa' étune si évo' é ne Osôé yat, a ke fe ôsu nalé.

11 Kalate be nga lôm Artaxerxès njô bôt a nga to avale mejô di: Bebo bisaé bôé bôt be to Osôé yat, a ke fe ôsu nalé. 12 Njô bôt a yeme'e na, Bejuif be nga so be wo be nga kui be bia Jérusalem; nde b'alôñ nlam ô wô'ô ben njôan a bo abé, be maneya lôñe mekak, a kôm mimbôka'a. 13 Eyoñe ji njô bôt a yeme'e na, nge nlam ôte w'aye lôñeban, a meka'a m'asondôban, b'aye bo te fe ya'ane taxe, nge akum, nge tañ, a jam ete d'aye su'ulane bo bejô bôt abé. 14 Nde amu bi adi nku ya nda njô bôt, a jam ete e nji yiane bia na, bi yen ane b'abiasé njô bôt, ajô te bi alôm njô bôte tyiñ a tu'a kate

nye; 15 nde te be tame jeñ kalate mintilane ya beéso bôé été: nalé w'aye yen kalate mintilan été, a yeme na, nlam ôte ô ne nlam ô wô'ô ben njôan, w'andamane fe bejô bôt a bitune mesi, a be nga té fe njoñ nlam ôte été melu mvus; ajô te nde nlam ôte ô nga tyamban. 16 Bi atu'a kat njô bôt na, nge nlam ôte w'aye lôñeban, a meka'a m'asondôban, zen éte w'aye bo te fe bi ngap Osôé yat.

17 Eyoñ éte njô bôt a nga lôme Rehum njôô, a Schimschaï ntili bekalate, a ba bevo'o ya nsamba wop be nga to Samarie, a mfa'a étune si évo' é ne Osôé yat éyalane na: Mvo'é, a ke fe ôsu nalé. 10 Kalate mi nga lôme bia a nga lañeban be sañesañ asu dam. 19 Ane me nga jô, a be nga jeñ, a yene na, nlam ôte ô nga té lumane bejô bôt melu mvus, a mbenan njôan a njoñ bi nga boban été. 20 Nalé fe biwôlô bejô bôt bi nga jôô Jérusalem, mbie bi nga jôô si se Osôé yat; a bôt be nga ya'ane be taxe, a akum, a tañ. 21 Eyoñe ji mi bo'an mvinda na, bôte bete be jô'é, a nlam ôte ô bo te lôñeban, akekui ma m'aye ve atañ. 22 Nalé fe taba'an ntye mi bo te bo jam ete atek: amu jé éndaman j'ayiane ke ôsu a bo bejô bôt abé?

23 Wôna éyoñ mejô ya kalate Artaxerxès njô bôt me nga lañeban asu Rehum, a Schimschaï ntili bekalate, a bôte ya nsamba wop, be nga ji'a ke Jérusalem be Bejuif, a tindi be a ngu a ayo'o na, be jô'é. 24 Eyoñ éte ésaé ya nda Zambe é ne Jérusalem é nga su'u; é nga su'u akekui mbu baa Darius njô bôte ya Perse a nga jôô.

5 Ane bekulu mejô, Aggée nkulu mejô, a Zacharie mon Iddo, be nga kulu Bejuif be nga to Juda a Jérusalem mejô; be nga kulu be mejô a jôé Zambe ya Israël. 2 Eyoñ éte Zorobabel mone Schealthiel, a Josué mone Jotsadak, be nga kôlô si, a taté lôñ nda Zambe é ne Jérusalem; a bekulu mejô ya Zambe be nga to fe nsamba wop, be volô'ô be. 3 Eyoñ éte fe Thathnaï, njô ya Osôé yat, a nga zu be be, ba Schethar-Boznaï, a bôte ya nsamba wop, a jô be avale di na, Za a nga ve mia atañe na, mi lôñ nda nyô, a sondô aka'a di? 4 Eyoñ éte bi nga kate be avale di, a kate fe be môé me bôt be nga to be lôñe' nda éte. 5 Ve dise ya Zambe wop e nga to be bemvendé ya Bejuif, a be nji tindi be na be jô'é, ve akekui ajô te d'aye ke be Darius, a éyalan j'aye beta so kalate ajô te.

6 Ntilane ya kalate Thathnaï; njôô ya Osôé yat, ba Schethar-Boznaï, a bôte ya nsamba wé be nga so Apharsac, mbe be nga to Osôé yat, be nga lôme Darius njô bôt; 7 be nga lôme nye kalate, a to ntilan avale di na: Be Darius njô bôte, mvo'é ése é bo'ok. 8 Njo bôt a yeme'e na, bi nga ke étune si ya Juda, akui nda ya beta Zambe, nje éte é ne nlôñan a beta mekok, a be maneya fe futi bilé meka' été; a ésaé éte j'ake ôsu a mban a j'abo fe ngule mo map. 9 Eyoñ éte bi nga sili bemvendé bete, a jô be avale di na, Za a nga ve mia atañe na, mi lôñ nda nyô, a sondô aka'a di? 10 Bi nga sili fe be môé map, ane bi aye tu'a kate wo, nde te bi aye tili môé me bôt be nga to be ôsu. 11 Ane be nga ve bia éyalan avale di, a jô na, Bi ne bebo bisaé be Zambe ya yôp a si, a bi alôñ nda é nga lôñeban mimbu abui mvus, nje beta njô bôte ya Israël a nga lôñ a sondô fe je. 12 Ve éyoñ beésa bangan be nga soñe Zambe ya yôp a yaa, ane a nga ve be mo me Nebucadnetsar njô bôte ya Babylone, mone Chaldéen, nnye a nga tyam nda nyô, a ke bôt Babylone. 13 Ve mbu ya ôsu

Cyrus njô bôte ya Babylone a nga jôô, ñwô Cyrus njô a nga ve atiñe na, be lôñ nda Zambe nyô. 14 Nalé fe bisua bi or a argent ya nda Zambe, bi Nebucadnetsar a nga nyoñe temple été a nga to Jérusalem, a ke bie temple ya Babylone été, mbie Cyrus njô bôt a nga nyoñe temple ya Babylone été, a bi nga vebane be mỗt a ne jôé na Scheschbatsar, nnye a nga telé njôô; 15 ane a nga jô nye na, Nyoñe' bisua bi, kele' futi bie temple a ne Jérusalem, nalé fe nda Zambe é lôñeba'anê vôme wé. 16 Eyoñ éte Scheschbatsar ate a nga zu, a bô'ô mimbôka'a ya nda Zambe é ne Jérusalem; ataté éyoñ éte azukui éyoñe ji é nga to é lôñeba'an, ve é ngenan te tame man. 17 Ajô te éyoñe ji, nge njô bôt a lô mvaé, be tame jeñ nda akume ya njô bot été, nje é ne Babylone wôé, a yen nge e ne nalé na, be lôñ nda Zambe éte Jérusalem; a njô bôt a tame fe lôme bia aval ane a nye'e mfa'a ya ajô di.

6 Eyoñ éte Darius njô ỗt a nga ve atiñ, a be nga jeñ nda be nga bo be na'ane bekalate, vôm be nga bo be na'an akum Babylone. 2 Ane be nga yen mvutane kalate Achmetha, nda njô bôt été é ne étune si ya Médie, a ntilane ya ba'ale jam ô mbe ntilan été na : 3 Mbu ya ôsu Cyrus njô bôt a nga jôô, ñwô Cyrus njô bôt a nga ve atiñe na: Mfa'a ya nda Zambe Jérusalem, nda éte é lôñeba'an, vôm be wô'ô tyi'i biôm, a be bô'ô mimbôka'a ya été ngu; nté yôpe ya été ô bo'o meny'i me mo mewôm mesaman, a ndame ya été meny'i me mo mewôm mesaman; 4 be lôñe' je a beta mekok minnoñe mila, a mimfefé mimbôñ nnoñe wua: a tañ b'aye ya'ane je é veba'an é so'o nda njô bôt. 5 Nalé fe bisua bi or a argent ya nda Zambe, bi Nebucadnetsar a nga nyoñe temple été a ne Jérusalem, a zu bie Babylone, be bula'ane bie, a beta ke bie temple a ne Jérusalem, ji ése vôme wé; a w'aye futi bie nda Zambe été.

6 Ajô te éyoñe ji, A Thathnaï, njôô ya Osôé yat, a Schethar-Boznaï, a bôte ya nsamba wôé be nga so Apharsac, mbe be ne Osôé yat, taba'ane vôm ate ôyap: 7 jôka'an ésaé ya nda Zambe éte; njôô ya Bejuif a bemvendé ya Bejuif be lôñe' nda Zambe éte vôme wé. 8 Ajô afe na, m'ave atiñ jam mi aye bo bemvendé ya Bejuif bete mfa'a ya nlôñan nda Zambe éte na: mfa'a ya akum njô bôt, tañe taxe ya Osôé yat, be ve ngul ése ya ve bôte bete tañe ya ya'an ésaé, be bo te yen njuk. 9 Nalé fe biôm b'ajeñ, bitoñe beyôm binyaka, a beyôm mintômba, a bone mintômba, mfa'a ya tyi'i Zambe ya yôp mimvean b'adi'i nduan; nalé fe nlisi, a nku, a vin, a mbon, aval ane beprêtre be to Jérusalem b'ajô, be va'a be melu mese te selan; 10 nde te be ne tyi'i Zambe ya yôp biôm bi ne mbamba menyum, a ye'elan ajô ényiiñ njô bôt, a ji ya bone bé. 11 Me maneya fe ve atiñe na, bôte bese mỗt a ye kôñelan njôane wu, be dutu'u mbôñ nda jé, a be bete'e nye yôp a yemete nye été yôp; a nda jé é bo' éduk amu ajô te: 12 nalé Zambe a nga ve jôé dé e tabe'e vôm ate a tyame'e bejô bôte bese a meyoñ b'aye same mo mape na, be kôñelane jam ete, a kômbô ndaman nda Zambe é ne Jérusalem éte. Ma Darius me vey a atiñ; be ba'ale'e de a ngul ése.

13 Eyoñ éte Thathnaï, njôô ya Osôé yat, a Schethar-Boznaï, a bôt ya nsamba wop, be nga bo jam ete a ngul ése, amu nlôman Darius njô bôt a nga lôm. 14 Ane bemvendé ya Bejuif be nga lôñ, a mam mese me nga ke ôsu, amu nkulane mejô Agée nkulu mejô a nga kulu, ba Zacharie mon Iddo. Nalé be nga lôñe je, a sondô fe je, aval ane ntiñetane Zambe

ya Israël ô nga to, avale fe ane atiñe Cyrius, a Darius, a Artaxerxès njô bôte ya Perse e nga to. 15 Ane nda éte é nga man éyoñ ngon Adar é nto melu mela, nje éte é nga to mbu samane ya Darius njô bôt a nga jôô.

16 Ane bone be Israël, beprêtre a Belévite, a bôte bevo'ô be nga so minkôm, be nga ba'ale ésulane ya ve Zambe nda éte ngum mvean a mevak. 17 Eyoñ be nga bo ésulane ya ve Zambe nda éte ngum mvean, be nga tyi'i beyôm binyaka ntet, beyôm mintômba mintete mibaé, a bone mintômba mintete minyin; be nga tyi'i fe beyôm bikela awôm a bebaé, be bo mvean amu abé ajô Israël ase, aval ane tañe meyoñe me Israël é né. 18 Ane be nga télé beprêtre minsamba miap, a télé fe Belévite minsamba ane b'aye bo be kelek, mfa'a ya bo ésaé Zambe, nje é ne Jérusalem; aval ane e ne ntilane kalata Moïse.

19 Ane bôt be nga so minkôm be nga ba'ale pâque éyoñ ngone ya ôsu é nto melu awôm a menyin. 20 Amu beprêtre a Belévite be nga mane tune bebien nsamba wua; bese be to mimfuban: ane be nga wôé pâque mfa'a ya bôte bese be nga so minkôm, a mfa'a ya bobenyañe bap beprêtre, a mfa'a wop bebien. 21 Ane bone be Israël be nga beta so minkôm, a ba bese be nga kandan mvine mame ya meyoñe ya si éte, a late be be, mfa'a ya jeñe Jehova, Zambe ya Israël, be nga di, 22 a ba'ale fête ya fembé é ne te mvusan melu zañbwa a mevak: amu Jehova a nga ve be mevak, a kôñelan nlem njô bôte ya Assyrie mfa'a wop, a ve mo map ngu ésaé ya nda Zambe, Zambe ya Israël.

7 Eyoñ mam mete me nga man, melu Artaxerxès njô bôte ya Perse a nga jôô, Esdras mone Sereja, mon Azaria, mone Hilkija, 2 mone Schallum, mone Tsadok, mone Achitub, 3 mon Amaria, mon Azaria, mone Merajoth, 4 mone Zerachja, mon Uzzi, mone Bukki, 5 mon Abischua, mone Phinéés, mon Éléazar, mon Aaron njô beprêtre — 6 Esdras ate a nga ke a so'ô Babylone. A mbe nya ñyeme ntili bekalate mfa'a ya metiñe me Moïse, mme Jehova, Zambe ya Israël, a nga ve; a njô bôt a nge ve nye jam ese a nga sili, aval ane wo Jehova Zambe wé ô nga to be nye. 7 Ane bevo'ô ya bone be Israël, a beprêtre, a Belévite, a beyia bia, a beba'ale mimbé, a Benéthinen, be nga ke fe Jérusalem, mbu zañbwale Artaxerxès njô bôt a nga jôô. 8 Ane a nga kui Jérusalem ngone tane, nje éte é nga to mbu zañbwale njô bôt a nga jôô. 9 Amu a nga taté téé Babylone éyoñ ngone ya ôsu é nto alu da; ane a nga kui Jérusalem éyoñ ngone tane é nto alu da, aval ane mbamba wo ya Zambe wé a ngo to be nye. 10 Amu Esdras a nga mane ve nleme na, a jeñe metiñe me Jehova, a bo me, a ye'ele memvinda a minjôan Israël été.

11 Mejô me mbe ntilane kalate Artaxerxès njô bôt a nga ve Esdras prêtre a ntili bekalate, nyô a mbe ntili bekalate mejô ya metiñe me Jehova, a memvinda a nga ve Israël, me mbe na: 12 Artaxerxès, njôô ya bejô bôt, a tili Esdras prêtre, ntili bekalate ya metiñe me Zambe ya yôp, a to zôsô, a ke fe ôsu nalé, 13 M'ave atiñe na, ba bese ya bôte ya Israël, a beprêtre bap a Belévite, be to si m'ajôô je, b'akômbô ke Jérusalem a nye'ane wop ôse, be kele' nsamba wôé. 14 Amu na, w'ake nlômane ya njô bôt a bebôndé mefe'e bé zañbwa, a ke sili mam mfa'a ya Juda a Jérusalem, aval ane metiñe me Zambe wôé me ne mo môé me né, 15 a ke fe be'e argent a or, mbie njô bôt ba be bebôndé mefe'e bé be

maneya ve Zambe ya Israël a nye'an, nnye ate éto jé a tabe é ne Jérusalem, 16 a fulane fe argent ase a or w'aye yen étune si ése ya Babylone, a mvean bôt b'ave ane minlem mi anye'e, a wu ya beprêtre, ñwô be nga ve a nye'an mfa'a ya nda Zambe wop é ne Jérusalem; 17 ajô te ô va'a ngul ése ya kus, a moné ate, beyôm binyaka, a beyôm mintômba, a bone mintômba, a fulane fe mimveane mi avute ya été, a mimveane binyunyui ya été, a w'aye tyi'i bie autel yôp nda Zambe wônan é ne Jérusalem. 18 A jam ese womien a bobenyôñe bôé mi ayene zôsô ya bo argent a or bi abuk, bo'ane nalé ane Zambe wônan a nye'e. 19 A bisua b'ave wo mfa' ésaé ya nda Zambe wôé, ô kele ' telé bie asu Zambe ya Jérusalem. 20 Nde jôm éfe ése b'aye jeñ mfa'a nda Zambe wôé, ji w'aye yene jame ya ve, ô va'a je é so'o nda akume ya njô bôt. 21 Nde fe ma, mamien Artaxerxès njô bôt, m'ave beba'ale akum bese be to Osôé yat atiñe na, biôm bise jôm Esdras prêtre, ntili bekalate ya metiñe me Zambe ya yôp, a ye sili mia, jam ete e boba'an a ngul ése, 22 nné ane betalent be argent ntet, a minkoé mi nlisi ntet, a beta minlônga be vin ntet, a beta minlônga be mbon ntet, a nku te lañ abim. 23 Jam ese Zambe ya yôp a tiñeti, be bo'o de aval ebien ane a jô mfa'a nda ya Zambe ya yôp; amu na, ayaa d'ayiane kui si njô bôt ba be bone bé b'ajôô je amu jé? 24 Nalé fe bi atu'a kate mia na, mfa'a ya beprêtre ba be Belévite, a beyia bia, a beba'ale mimbé, a Benéthinen, nge bebo bisaé ya nda Zambe éte, d'aye bo ane ntyaman atiñ nge mô't a bete be taxe, nge akum, nge tañe ya ya'an. 25 Mfa'a wôé, A Esdras, aval ane fe'e ya Zambe wôé é ne mo môé é né, ô tel'éé bivet a betyi'i mejô, mbe b'aye tyi'i bôte bese be to Osôé yat mejô, ba bese b'ayem metiñe me Zambe wôé; a mi ye'ele fe nyô a ne te yeme me. 26 Bôte bese mô't a ye bo te bo metiñe me Zambe wôé, a metiñe me njô bôt, be ve ngul ése ya ve nye melep, to ma ya wu, to ma ya nkabane si fe, to ma ya nsaan akum, nge mimbôk.

27 Ebotan a Jehova, Zambe ya beésa bangan, nnye a nga futi aka'a jame di nlem njô bôt, na, a ve nda Jehova abeñ, nje é ne Jérusalem; 28 nnye ate fe a veyá me mvam mise me njô bôt, a bebôndé mefe'e bé, a mise biwôlô bivete bi njô bôte bise. Nalé me nga bo ngu aval ane wo ya Jehova Zambe wom ô nga to be ma, ane me nga sulane benya bôtô be so' Israël be ke nsamba wom.

8 Mina mi ne minlô mi bôte ya menda beésa bap, a bina bi ne bindane ya be nga ke nsambe wom akôlô Babylone melu Artaxerxès njô bôt a nga jôô: 2 Mfa'a ya bone be Phinéés, Geurschom. Mfa'a ya bone be Ithmar, Daniel. Mfa'a ya bone be David, Hatthusch. 3 Mfa'a ya bone be Schecania, mfa'a ya bone be Pareosch, Zacharie; a befam ntet a mewôm metan be nga ke nsamba wé amu nlañan éndan. 4 Mfa'a ya bone be Pachath-Moab, Eljoénaï mone Zerachja; a befam mintete mibaé nsambé wé. 5 Mfa'a ya bone be Schecania, mone Jachaziel; a befam mintete mila nsamba wé. 6 A mfa'a ya bone be Adin, Ébed mone Jonathan; a befam mewôm metan nsamba wé. 7 A mfa'a ya bone be Élam, Esaïe mon Athalia; a befam mewôme zañbwa nsamba wé. 8 A mfa'a ya bone be Schephathia, Zebadia mone Micaël; a befam mewôm mwom nsambé wé. 9 Mfa'a ya bone be Joab, Abdias mone Jehiel; a befam mintete mibaé awôme da a mwom nsamba wé. 10 A mfa'a ya bone be Schelomith, mone Josiphia; a befam ntet a mewôm mesaman nsambé wé. 11 A mfa'a ya bone be Bébaï; Zacharie mone Bébaï; a befam mewôm mebaé a mwom nsamba wé. 12 A mfa'a ya bone be

Azgard, Jochanan mone Hakkathan; a befam ntet a awôme da nsamba wé. 13 A mfa'a ya bone be Adonikam, mbe be nga to susu'a; môé map me ne na: Éliphéleth, Jeïel, a Schemaeja; a befam mewôm mesaman nsamba wop. 14 A mfa'a ya bone be Bigvai, Uthai ba Zabbud; befam mewôme zaïbwa nsamba wop.

15 Ane me nga sulane be vôme wua mfa'a ya ôsôé vi ake Ahava; a vôm ate bi nga bômbô melu mela: ane me nga fombô bôt, a beprêtre, te ke koé môte ya bone be Lévi vôm ate. 16 Eyoñ éte me nga bañete Éliézer, Ariel, Schemaeja, a Elnathan, a Jarib, a Elnathan, a Nathan, a Zacharie, a Meschullam, be mbe benya bôtô; me nga bañete fe Jojarib ba Elnathan, be mbe beye'ele. 17 Ane me nga lôme be be Iddo évet vôme ya Casiphia; ane me nga kate be jam b'aye jô Iddo, a bobenyañe bé Benéthinién, mfa'a ya vôm ate Casiphia, na, b'ayiane zu bia bebo bisaé mfa'a nda ya Zambe wongan. 18 Nde aval ane mbamba wo ya Zambe wongan a nga to be bia, nalé be nga zu bia môte ya fek mfa'a ya bone be Machli, mone Lévi, mon Israël; nalé fe Schérébia, ba be bo be fam bé a bobenyañe bé, bôt awôm a mvom; 19 a Haschabia, Ésaie môte ya bone be Merari a to fe nsamba wé, bobenyañe bé a bo be fam bap, bôte mewôm mebaé; 20 a mfa'a ya Benéthinién, mbe David ba be bivet be nga ve mfa' ésaé ya Belévite, Benéthinién mintete mibaé a mewôm mebaé: bese be mbe ntotane môé.

21 Eyoñ éte me nga jô bôte na, be tyi bidi vôm ate, mfa'a ya ôsôé Ahava, nde te bi aye suu biabebiene si asu Zambe wongan, a jeñe zôsôa zen be nye mfa'a wongan, a mfa'a ya ayôme bone dangan, a mfa'a ya biôm biangan bise. 22 Amu me nga wô' ôsone ya ja'é njô bôt nsamba bezimbi a bôt b'awulu bikabela yôp be volô bia zen mfa'a ya besiñe bangan, amu bi nga mane kobô njô bôte na, Wo ya Zambe wongan ô ne be ba bese b'ajeñe nye, mfa'a ya bo mvaé; ve ngule jé a ayaa dé bi akui be ba bese b'ali'i nye. 23 Nalé bi nga tyi bidi a ye'elane Zambe wongan ajô te: ane a nga wô'ô bia.

24 Eyoñ éte me nga kandé bivete ya beprêtre awôm a bibaé, Schérébia, a Haschabia, a bobenyañe bap awôm ba be be, 25 a ve'e be argent kop, a or, a bisua, biôm bi nga veban amu nda ya Zambe wongan, bi njô bôt, a bebôndé mefe'e bé, a bivete bié, a Israël ase a nga to vôm ate, be nga ve: 26 ane me nga ve'e betalent be argent mintete misaman a mewôm metan a kee be mo, a bisua bi argent betalent ntet; a or betalent ntet; 27 a bido'o bisua bi or mewôm mebaé, tañe bedarique toyini wua; a bisua bi mbamba mvot a ngemban bibaé, bi to fe édima ane or. 28 Ane me nga jô be na, Mi nto étyi be Jehova, a bisua bi nto fe étyi; a argent a or bi ne mvean ane minlem mi anye'e be Jehova, Zambe ya beéso benan. 29 Momba'an, a ba'ale bie, akekui mi aye ve'e bie kop mise bivete ya beprêtre a Belévite, a bivete ya menda beésa ya Israël, Jérusalem, bitune menda ya nda Jehova été. 30 Nalé beprêtre a Belévite be nga nyoñe tañ argent a or be nga ve'e kop, a bisua, nde te b'aye ke bie Jérusalem nda ya Zambe wongan.

31 Eyoñ éte bi nga kôlô ôsôé Ahava éyoñ ngone ya ôsu é nto melu awôm a mebaé, a ke Jérusalem: ane wo ya Zambe wongan ô nga to be bia, ane a nga nyii bia mo besiñe bangan a bôt be nga yabe zen. 32 Ane bi nga suane Jérusalem, a tabe wôé melu mela. 33 Môse nyini argent a or a bisua bi nga ve'ebane kop nda ya Zambe wonga été a vebane mo me Merémouth mon Urie prêtre (Éléazar mone Phinéés a to nsamba wé: a Jozabad mone Josué ba Noadia mone Binnui,

Belévite, ba be be be nga to fe)—34 biôm bise bi nga lañeban tañ a abim adit: a abim adit ete ese e nga tililban éyoñ éte.

35 Ane bôt be nga so minkôm, ba be nga so mfa'a be nga kape be, be nga ty'i Zambe ya Israël mimvean b'adi'i nduan, mfa'a ya Israël ase beyôm binyaka awôm a bebaé, beyôm mintômba mewôm ébu a besaman, bone mintômba mewôme zañbwa a zañbwa, a beyôm bikela awôm a bebaé mfa'a ya mvean amu abé: biôm bite bise bi mbe mvean b'adi'i nduan be Jehova. 36 Ane be nga liti bivete ya njô bôt, a bejôô be nga to Osôé yat, minjôane mi njô bôt: mbe be nga tindi bôt a mame ya nda Zambe ôsu.

9 Eyoñ mam mete me nga man, bivet bi nga zu me bebé, a jô na, Bôte ya Israël, a beprêtre a Belévite, be nji kandane bôte ya mesi, ve bo mbia be mam map, ma ya Becananéen, Behéthien, Bephérézien, Bejébusien, Beammonite, Bemoabite, Beégyptien, a Beamoréen. 2 Amu be maneya nyoñe bengone bap mfa'a wop bebien, a mfa'a ya bo be fam bap, ajô te mvoñ bôt é ne étyi é maneya fulan a bôte ya mesi mesi: ya, wo ya bivet a bejôô ô maneya tebe ôsu mfa'a ya nkobane wu. 3 Eyoñ me nga wô'ô jam ete, me nga nyap ngômesane jam a éwomane jam, a té fe ésile ya nlô a ze, a tabe si fe'e ne vema! 4 Eyoñ éte mô't ase a nga fô'ôban amu mejô me Zambe ya Israël a nga sulane vôm me nga to, amu ajô nkobane ya ba be nga so minkôm; ane me nga tabe si fe'e ne vema akekui éyoñ be nga bo be va'a jôme ya nkañane ya mam me ngô'é.

5 Eyoñ be nga bo be va'a jôme ya nkañane ya mam me ngô'é éte, ane me nga kôlô si vôm me nga to nsilibane si, ngômesane jam a éwomane jam minyaban minyaban; ane me nga kute meboñe si, a same mo mam be Jehova Zambe wom; 6 ane me nga jô na, A Zambe wom, m'awô'ôson a asu e maneya me zôñelan a ôsone ya bete asu dame yôp be wo, A Zambe wom; amu mbia be mam mangan me maneya nene minlô miangane yôp, a mekua mangan me neneya akui yôp été. 7 Ataté melu beésa bangan be nga to, bi boya étua bijô azukui môse wu; biebien, a bejô bôte bangan, a beprêtre bangan, bi nga mane vebane mo bejô bôte ya mesi mesi amu mbia be mam mangan, mfa'a ya tôban nkpwaté mekôn, a minkôm, a nsabane biôm, a ôsone mesu, aval ane e ne môse wu. 8 Eyoñe ji mvam é so'o be Jehova Zambe wongan é maneya litibane be bia ôyôme mon nté éziñ, a lí'i bia mebuka'a ya nyiñ, a ve fe bia sen vôme wé a ne étyi été, nde te Zambe wongan a ye kui bia mis, a wômôlô bia ôyôme jôm vôm bi ne éto belo. 9 Amu bi ne belo; ve a kôsa bo nalé, Zambe wongan a nji jô'é bia éto belo jangan été, ve a litiya bia mvam mise bejô bôte ya Perse, a beta wômôlô bia, mfa'a ya beta télé nda ya Zambe wongan, a kôme fe mevôm me nga ndaman, a ve fe bia akak Juda a Jérusalem été. 10 Eyoñe ji, A Zambe wongan, ane jame di e boya ana, bi aye beta jô aya? Amu bi maneya lí'i metiñe môé, 11 mme ô nga tiñeti a menyu bebo bisaé bôé bekulu mejô, a jô na, Si ya mi nga ke été na mi nyoñe je, é ne si ya mvin amu mvine ya bôte ya mesi mete, amu mbia be mam map, mme me maneya jalé je ataté aku'u da akui di vok a mbia mvine wop: 12 ajô te éyoñe ji te veane bo be fam bap bengone benan, nalé fe te nyoñane bengone bap mfa'a ya bo be fam benan, nge jeñ mvo'é jap nge akume dap nnôm éto; nde te mi aye bo ngu, a di mbamba be biôme ya si éte, a lí'i je

ngap be bone benan nnôm éto. 13 Eyoñ éte mam abui me maneya kui be bia amu mbia mimboane miangan, a amu beta bijô biangan, vôm womien Zambe wongan ô lebeya bia tyôtyoé, sa abim e nga yian mbia be mam mangan, a ô veyá fe bia avale mebuka'a di, 14 ye bi aye beta tyam metiñe môé, a laten meyoñ m'abo mbia be mam ma? Ye ô nga ye bo te yaa akekui ô nga ye mane jiane bia, nalé ate mebuka'a me nga ye bo momo, nge môte ya nyiñ? 15 A Jehova, Zambe ya Israël, wo ô ne zôsô; amu bi lí'ya ve mebuka'a me nga nyiñ, aval ane e ne môse wu: ô lô, bi ntele asu dôé a bijô biangan; amu te ke môt a ne ngule ya tebe asu dôé amu ajô di.

10 Nté ya Esdras a nga ye'elan a mem abé, a yi a wua nyôle si asu nda Zambe, étua beta nsamba ya befam a binga a bongô, é so' Israël, é nga sulane vôm a nga to; amu bôt be nga yi beta ñyian. 2 Ane Schecania mone Jehiel, mone wua ya bone be Élam, a nga yalan a jô Esdras na, Bi maneya kop mfa'a ya be Zambe wongan, a bi maneya lu'u bengone biku be meyoñe ya si nyô: ve a kôsa bo nalé, ndi é ngenan Israël nlem mfa'a ya ajô di. 3 Ajô te éyoñe ji bi tame bo élat a Zambe wongan, a tiñeti na, bi aye vaa binga bete bese, a ba be nga bialé be be, aval ane fe'e tate wom é né, a fe'e ya ba b'afô'ôban amu atiñe ya Zambe wongan; jam ete e tame boban aval ane metiñ m'ajô. 4 Kôlô'ô si, amu ajô te e ne ajô dôé, a bi ne ngame jôé: bo' ayo'o nlem, a bo de.

5 Eyoñ éte Esdras a nga kôlô si, a tindi bivete ya beprêtre, a Belévite, a Israël ase na, be kan ngana na, b'aye bo ane ajô te e né. Nalé be nga kan ngana. 6 Eyoñ éte Esdras a nga kôlô si vôm a nga to asu nda Zambe, a ke nyin étun nda Jochanan mon Éliaschib: éyoñ a nga kui wôé, a nga bo te di bidi, nge nyu mendim; amu a nga wô' ôlun ajô nkobane ya ba be nga so minkôm. 7 Ane be nga lôme foé mfa' ôse ya Juda a Jérusalem be bôte bese be nga so minkôm, na, b'ayiane sulane vôme wua Jérusalem; 8 a bôte bese môt a ye bo te zu nné ane melu mela, aval ane fe'e ya bivet a bemvendé é nga to, a ye supe biôm bié bise, a b'aye fe kandé émien nsamba ya bôt be nga so minkôm.

9 Eyoñ éte befam bese ya Juda a Benjamin be nga sulane vôme wua Jérusalem nné ane melu mete mela (éyoñ éte ngon ébulu é nto, ngon éte é nto melu mewôm mebaé); a bôte bese be nga tabe si éndendañ nseñ mbé si ya nda Zambe, be fô'ôba'an amu ajô te, nalé fe amu beta mveñ. 10 Ane Esdras prêtre a nga tebe tetele, a jô be na, Mi maneya kop, a lu'u bengone biku, mfa'a ya nene bijô bi Israël. 11 Ajô te éyoñe ji, meman abé denan be Jehova, Zambe ya béeso benan, a bo ane a nye'e; mi kanda'ane meyoñe ya si nyô, a bengone biku. 12 Eyoñ éte ngum ésulan ôse ô nga yalan a jô tyiñe yôpe na, Aval ane w'ate jô ajô dangan, nalé bi ayiane bo. 13 Ve bôt be ne abui, a éyoñe ya abui mveñe ji, a bi se ngule ya tebe atan: nalé fe jame di e nji bo ésaé ya môse wua nge mibaé; amu bi dañeya mane kop ajô di. 14 Me'ete'e na, bivete biangan bi teléban mfa'a ya ngum ésulan ôse, a ba bese be ne minlam miangan be maneya lu'u bengone biku be za'a biyoñ bi ne mintiñetan, ba be bemvendé ya nlam ôse, a betyi'i mejô ya été, akekui mbia ayaa ya Zambe wongan a ye kôñelan a kôlô be bia, akekui fe jame di d'aye kômban. 15 Ve Jonathan mon Asaël étam, ba Jachzia mone Thikva be nga tebe jam ete ngame yat: a Meschullam ba Schabthai mone Léвите be nga volô be.

16 Ane bôt ve nga so minkôm be nga bo nalé. Ane Esdras prêtre, ba be minlô mi bôt mivo'o ya menda beésa, aval ane menda beésa map me né, mise mi lañebane fe môé, be nga teléban ; ane be nga tabe si a fombô jam ete éyoñ ngon awômô é nto alu da. 17 Ane be nga mane mejô ya befam bese be nga lu'u bengone biku nné ane môse ya ôsu ngone ya ôsu.

18 Mfa'a bone ya beprêtre, be nga yene bevo'o be nga lu'u bengone biku: be mbe na, mfa'a ya bone be Josué mone Jotsadak, a bobenyañe bé, Maaséja, a Éliézer, a Jarib, a Guedalia. 19 Mbe bete be nga tiñeti a mveane mo, na, b'aye suu binga bap; a vôm be mbe étom, be nga tyi'i nnôm ntômba ya mbam mfa'a ya étome jap. 20 A mfa'a ya bone be Immer: Hanani ba Zebadia. 21 A mfa'a ya bone be Harim: Maaséja, a Élie, a Schemaeja, a Jehiel, a Ozias. 22 A mfa'a ya bone be Paschhur: Eljoénaï, Maaséja, Ismaël, Nethanee, Jozabad, a Éleasa.

23 Mfa'a ya Belévite: Josabad, a Schimeï, Kélaja (nnye a ne fe Kelitha) Pethachja , Juda, a Éliézer.

24 Mfa'a ya beyia bia: Éliaschib. A mfa'a ya beba'ale mimbé: Schallum, a Thélem, a Uri.

25 Mfa'a ya Israël: Mfa'a ya bone be Pareosch: Ramia, a Jizzija, a Malkija, a Mijamin, a Éléazar, a Malkija, a Benaja. 26 A mfa'a ya bone be Élam: Matthania, Zacharie, a Jehiel, a Abdi, a Jerémoth, a Élie. 27 A mfa'a ya bone be Zatthu: Eljoénaï, Éliaschib, Matthania, a Jerémoth, a Zabad, a Aziza. 28 A mfa'a ya bone be Bébaï: Jochanan, Hanania, Zabbai, a Athlaï. 29 A mfa'a ya bone be Bani: Meschullam, Malluc, a Adaja, Jaschub, a Scheal, a Jerémoth. 30 A mfa'a ya bone be Pachath-Moab: Adna, a Kelal, Benaja, Maaséja, Matthania, Betsaleel, a Binnui, a Manassé. 31 A mfa'a ya bone be Harim: Éliézer, Jischija, Malkija, Schemaeja, Siméon, 32 Benjamin, Malluc, a Schemaria. 33 Mfa'a ya bone be Haschum: Matthnaï, Matthatha, Zabad, Éliphéleth, Jérémaï, Manassé, Schimeï. 34 Mfa'a ya bone be Bani: Maadaï, Amram, a Uel, 35 Benaja, Bédia, Keluhu, 36 Vania, Merémoth, Éliachib, 37 Matthania, Matthanaï, a Jaasaï, 38 a Bani, a Binnui, a Schimeï, 39 a Schélémia, a Nathan, a Adaja, 40 Macnadbaï, Schaschaï, Scharaï, 41 Azareel, a Schélémia, Schemaria, 42 Schallum, Amaria, a Joseph. 43 Mfa'a ya bone be Nebo: Jeïel, Matthithia, Zabad, Zebina, Iddo, a Joël, a Benaja. 44 Balé bete bese mbe be nga nyoñe bengone biku, a lu'u be; a bevo'o ya été be nga bili binga be nga biaé be bon.

Rev. Matthias MEYE
Secrétaire Général 1961.....